



# Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma : Tir Yimiyim

tiryimiyim@aolima

tir yimiyim

TAPAK 8

NATO-i Ukraine nem sen billion \$43 jenjang teyari agütsütsü nangzük

Mumbai City FC-i Nikolaos Karelis alizükog



VOL. XXI ISSUE NO. 270 (ADOK 270) DIMAPUR ROGONÜ (FRIDAY) CHITENI (JULY) 12, 2024 ₹ 5.00

## Nagaland Cabinet-i ULBs nung anti-defection law indang jemb

**Kohima, Chiteni/July 11 (TYO):** State nung Urban Local Bodies (ULBs) indang züngsem shimteta aliba telok ka yutsür kati aoba anendaksütsü atema Nagaland sorkari ozüing ka yanglutsü atema inyakteper, ta Nagaland state sorkar indang odongtar kati ashi.

Brehostibarnü State Cabinet senden ka amendang iba ken o jemb, ta state sorkar indang odongtar aser Minister, Tourism & Higher Education, Temjen Inna Along-i ashi.

Iba ya Kerala model ama asütsü, kong Kerala Local Authorities (Prohibition of Defection) Act, 1999 mapa kuma amshia arur, ta pai ashi.

Kohima nung tawa party senden ka alidang ULBs inyakyim azüoktsü atema temzüing ozüing aser anti-defection law yanglutsü aser ULB cell ya full-fledged Directorate akumtsü atema Cabinet nung jembitsü, ta Nagaland Chief Minister Neiphiu Rio-i sangdonga liasü.

Cabinet ajanga Eastern Nagaland tesem nung aliba district trok kübok town councils 24 nung züngsem shimtsü (nominate) atema jemb, kong Eastern Nagaland Peoples' Organisation (ENPO) ajanga Frontier Nagaland Territory khanga elections nung shilem magitsü sangdonga liasü, ta sorkar odongtari ashi.

Ajisüaka Nagaland nung ULB elections indang Supreme Court

ajanga obendang agütsüba sülen ang iba ken o tatem kuma jembitsü lemtet, ta ashi. Supreme Court ajanga iba ken o July 16 nung jembitsü amai lir.

Eastern Nagaland tesemtem nung election magi asünung item tesemtem terenlok asoshi nüburtem den yaritepsü nüngdaker ta ajiteta sorkari town councils nung nominated members shimtsü asadanger, ta CM Rio-i tawa shia liasü.

Item maparen reprangshimtsü aser ULBs atema full-fledged Directorate amenoktsü atema asameyangtsü atema tanü cabinet senden nung committee ka tenteta liasü, ta sorkar indang odongtar aser Minister, Environment, Forest & Climate Change and Village Guards, CL John-i ashi.

Ajisüaka item inyakyim asoshi tatembang telemetba ya taruba cabinet senden nung agitsü, ta paia ashi. While urging all the players and football fans to gear up for the most celebrated tournament, the Organizing Committee announced that this year, there is an open invitation for ground management and those interested may contact the organizers on or befor August 4.

The team entry forms for the tournament will be made available soon, they said.

## Kohima nung World Population Stabilization Fortnight tenzük



Kohima nung July 11, 2024 nü Saarthi on Wheels - Mission Parivar Vikas asoshi gari ka CMO Kohima, Dr. Leamneyi Konyak-i semzüksüba noksa nung angur.

**Dimapur, Chiteni/July 11 (TYO):** District Health Society, Department of Health & Family Welfare, NHM lungjemer The New Identity of Vikshit Bharat, Family Planning the Pride of Every Couple" yimiyim kübok aser "Healthy Timing & Spacing of Pregnancies for Wellbeing of Mother and Child" omen nung ajemdaker July 11, 2024 nü CMO indang Conference Hall nung World Population Day munga liasü.

Iba sentong nung DPM, Avikali Jakhalu menden liasü aser DPO (RCH/UIP) Dr. Khrievilhou-i July 11 nungi 24, 2024 tashi "World Population Day & Population Stabilization Fortnight" indang nung jembia liasü.

Pai advocacy aser awareness campaigns indang osang lemsatepa liasü, koba Kohima district kübok blocks aser yimsüing ajak nung agitsü aser iba mapang Family Planning methods - contraceptives amshiba aser tanur ana tsüingta mapang peria ayuba, meilongi kibong akumtsü aser mezüing tanur asoba, IUCD & PPIUCD Insertions amala Family Planning services agiba, Condoms, Tubectomy & Vasectomy amshiba aser HIV/AIDS

awareness agütsüba amala sayutsü, ta ashi.

Advocacy mapang awareness agütsüba ama nüburtem nem tain kumer kibong akumba, tanur asotsü asoshi tetsüingta nung mapang peria ayuba, post-partum family planning, family planning nung tebur temi shilem agiba, post abortion family planning amala angatetdaksütsü.

Population Fortnight mapang New Family Planning Media Campaign den liru medema pamphlets aser leaflets lema agütsütsü, tongtipang tesemtem nung banners aser posters inoktsü.

CMO Kohima, Dr. Leamneyi Konyak-i iba sentong nung jembidang, alima nung nisung meimchir nütsüing arenba aser ibaji ajanga nüburtem dak kongshiba indang awareness agütsütsü nükjidong nung World Population Day ya July 11 nung amunger, ta ashi.

United Nations ajanga tenzüka iba anogomung nung reproductive health, family planning, gender equality aser sustainable development amala indang nüburtem dang sayur, ta ashi.

Tayongzükba aser maongka tem angateta World Population Day amungba ajanga sorkar, lokti

tetet aser kija nem sensaksema mapa inyaksü maongka agütsür.

World Population Day ya UN ajanga 1989 küm mezüing amung. 1987 küm July 11 nü alima nung nisung meimchir nütsüing yongsük billion pongu ajungba ajanga iba anogomung amungtsü shisatsü angu aser World Bank nung senior demographer Dr. KC Zachariah-i iba anogo ya World Population Day ta amungtsü junger ta shia liasü, ta Dr. Leamneyi Konyak-i ashi.

Taküm iba anogomung omen ajanga teblemtsü balala angateta solution bushitsü aser terenlok alitsü atema data bendenba nung temulung agütsütsü tongtipang ta sayur, ta pai ashi.

CMO ajanga Family Planning objectives kübok Saarthi on Wheels - Mission Parivar Vikas indanga jembia aser iba nükjidong ya 2025 küm tashinung TFR ya 2.1 kuma ajemtsü, osangtsüsang, reliable services & supplies nung ajemdaker quality family planning alternatives agütsütsü, contraceptives amshitsü atema services tajung agütsütsü, contraceptives amshitsü aser family planning atema awareness prokshitsü, kibong tulu nungi Sub-Centre level nung Injectable contraceptives methods amshitsü aser family planning insurance scheme ajanga sterilization services ulushitsü asoshi lir ta ashi.

Saarthi Van ya IEC devices, family planning commodities, education, information aser communication materials keta yanglushir aliba van lir.

Awareness sentong balala ayongzükba World Population Stabilization Fortnight amungtsü kanga tongtipang lir aser iba mapang health provider aser frontline workers temi mapa shidak aser tasü ita inyaksüla, ta paia ashi.

## Manipur tensa tajungba makumer: Rahul Gandhi

**Imphal, Chiteni/July 11 (Agencies):** Congress lenir Rahul Gandhi-i Ato Kilonser Narendra Modi dang tekeraba nung Manipur nung teka amoktsü ajungshi, kong azüdokshi ajanga iba state kanga mejungi sadanger lir.

Taoba küm May ita nungi Manipur nung azüdokshia tensa mejungi arudang Rahul Gandhi-i tawa agi tasemben iba state semdangogo aser yangji yimjung aser tesunep atema inyaksangshiba nung terenlok makaba atema sasa bilemba lemsatepa liasü.

"Manipur nung azüdokshi tenzük ni asemben buba semdangogo, saka tesusatsüka yangji tensa terenlokba mali - state ya shilem ana kuma sadanger lir," ta

pai ashi.

"Nisung aliba ki rongdoker, tai maket takumtem lendong nung lir aser kibong meyirijang aika relief camps nung alir."

PM Modi-i tsüingdong oa iba state semdangtsüla, nüburtemi jembiba angadangtsüla aser yimjung asoshi ayongzüksüla, ta Rahul Gandhi-i ashi.

"Ato kilonser ya Manipur-i arutsüla aser state nung nüburtem teblemtsü angadanga yimjung asoshi ayongzüksüla," ta pai ajungshi.

Congress leniri par party den opposition coalition INDIA (Indian National Democratic Inclusive Alliance) ajanga maneni sorkari dang Manipur teblemtsü bentettsü atema akhangtsü ta ashi.

## Ungma yimsüsür Wb. Rarenbenba Tatar-i 'Guru' nüngja angu

**Ungma, 11th July (TYO):** Ungma Kosasanger yimsüsür Wb. Rarenbenba Longkumer Tatar-i Guru nüngja anguba sentong ka yangi Langpanglenden, Ungma nung meraketa agiogo. Pai iba 'Guru' nüngja ya Ministry of Culture, Government of India, Guru-Shishya Parampara Scheme kübok anguba lir.

Guru Rarenbenba-i iba sentong nung jembidang, pa lanuwa küm 6 asüdang nungi sobaliba kentenmenü tsütsü kanga jangrabangra angazüka aruba kar ashi.

Pa lanuwa tsürabur, teti nunger aser tantsü-tambu aser yimsüsürtem nungi sobaliba

kentenmenü aser yartsüngsangtem angazükba den liyonga arudang asen lima aser India tesem balala sema sobaliba kentenmenü sentongtem nung shilem agia aruogo. Aji oda, tanü pai "Guru" nüngja ajangzükttetsüsa jenjang tongtetba asoshi pa den yariteper ajak dang pelaba metetdaksü.

Tanü nungi ano tajungba aser temerangba nung lanurtem aser tangazükürtem nem tsürabur sobaliba kentenmenü aser iba dak sentakba shisatsü balala sayutsü tejangraba aser tangatetba aliba paia shisem.

Arishi küm 46 tain yimsüsür Guru Rarenbenba ya Ungma nunger asür Imtiakum jabaso lir.



Guru Rarenbenba Tatar

Kinungtsü Longkong tsür Wt. Imoyangla Jamir, tena nem jabaso 2 aser jala ka moaja lir. Guru nüngja angur rongnung Guru Rarenbenba ya tanubuti

asütsü, ta osang ajanga angazükür.

Sentong nung Mokokchung District Culture Officer, Wb. Ayim Ao-i mapang tatsüka agidang, meranga inyaker iba jenjang tongtetba asoshi pelaba den meranga inyakeratem abo ano maongka jenti lir, ta ashi.

Kechi mapa nung südir süaka, tagitaratsü rizüingba (documentation) ta kanga tongtibang lir, anungji, maparen ajak nung talisa tarutsü nunga sobaliba kentenmenü luyim tsütsü tejangrar ali nungbo documentation nung temulung agütsütsü asoshi paia ajungshi.

Tang tashi nung Ungma yim nungi Guru nüngja angurtemji -

asür Guru Sademmeren, Guru Sangyusang Pongen, Guru Senlitula, Guru Rarenbenba aser ano yakta par yim nungisa nisung kati Guru nüngja angutsü osang tejangja kar.

Iba sentong nung Longtrok Senden Ungma, repsem zülur, Kr. Limasenla T. Longkumer menden liasü. Sentong nung Wb. Tamsüzenba Tatar, Guru Sangyusang Pongen, Wb. Lipokzülu Tatar parnokia o tatsütsü agia jembia. Ungma Baptist Arogo, Pastor, T. Wati den temoatsü meshia sarasademer tenzük aser Assoc. Pastor (W), Rev. Talijunglai tenüngsang agüja sarasademer sentong tembang.

# Tizit nung palm oil aluyimertem nem machine lemtsü



Tizit nung pump oil aluyimertem nem osettsüt balala lemtsüba sentong nung tangokba noksa angur.

**Dimapur, Chiteni/July 11 (TYO):** SDAO Tizit kübok Department of Agriculture-i, NMEO-OP 2023-24 kübok July 11 nü Tizit nung palm oil aluyimertem nem machine balala lemtsüba sentong ka ayongzüka agiogo.

SDO(C) Tizit, Tumben P Tsanglao, shiba iba sentong nung alakteta jaoker ama shilem agia liasü, pai aluyimertem dang Fresh Fruit

Punch- FFP production tali kümdaktsütsü atema alutem tetuyuba agütsür aliba ama anepalutsü ajungshia liasü.

Paisa, aluyimertem dang department aser company (Patanjali) indang teyari agia alu tuluba chipoka ayimtsü ajungshia liasü.

Sentong nungsa SDAO Tizit, Myanthung Patton-i, lenmang balala ajanga palm oil aluyimertem nem takokba

tashi teyari agütsütsü atema department-i inyakdar, ta ashi.

Iba sentong agiba mapang lemtsüba machine tem rongnung HP Water Pump, brush cutters, harvester, Power Dealers, Brush Cutters with attachments, Pruning tools aser fungicides densema liasü.

Sentong nung Patanjali Company nungia lenirtemi shilem agia liasü.

# NFHRCC aser Ex-PAN nati asükhu lemsatep

**Dimapur, Chiteni/July 11 (TYO):** NFHRCC-i sangdong ka ajanga Executive Engineer PWD (R&B), Dimapur Division Er. Inahoto Sema tebur asür Zhetovi Sema Ex. Minister, July 10 nü CHISR, Dimapur nung asüba osang angazüka mang ayimba lemsatepogo.

Pa ya par mapang nung Kiphirie district nungi tongtibang lenir ka liasü, shibai par nüburtem tenüing nung nokdaka liasü. Pa tongtibang lokti lenir ka aser 1969 nungi 1974 tashi NLA züngsem ka liasü.

Mangyim jashi nung aliba mapang onoki asür kinungertenden asükhu lemsateper aser asür tanüla teti tatem makadak anisüngzükdakjang ta sarasademtsür, ta kasa sangdong ajanga metetdaktsü.

Kasa mapang nung Ex-Parliamentarians Association of Nagaland (Ex-PAN)-ia, züngsem tejen Zhetovi Sema Dimapur nung July 10 nü asüba osang angazüka mang ayimba lemsatepogo.

Asür Zhetovi ya masü tashi Ex-PAN züngsem ka liasü aser pa amala züngsem tejen ka asüba ya association asoshi takoksa tulu aser pai toktsüba tawa ya süngdaktsütsü atema tasak asütsü. Zhetovi ya

anütoklen aliba Sumi nunger aser ENPO atema lenirtem rongnung mezüingpur ka dang masü saka Naga nunger ajak atema lenir ka liasü, shiba Regional Council züngsem ka liasü.

Pa Nagaland Legislative Assembly (NLA) 2buba House atema Tuensang Regional Council-i 1969 küm nominate asü aser iba sülen 3buba NLA atema 1974 küm 59th Seyochung-Sitimi assembly constituency nungi shima liasü.

Asür Zhetovi-i, state atema aser talisa Nagaland kübok anüolen aliba tesemtem atema tanen makai inyakogo. Nagaland sorkar kübok Minister ka ama pai pa nem nongloktsüba department tem amenoktsü meranga aruogo.

Pa asüba ya Ex-PAN atema tebuti ka asüba ama lir. Eastern Nagaland kübok aliba nüburtem aser talisa eastern Sümi nungertem atema pa asüba ya takoksa tulu lir.

Ex-PAN züngsemtemi asür kinungertem den asükhu lemsateper aser tulusang Tsüngremi parnok nem anisüngzüak agüjang ta aser asür tanüla teti tatem makadak anisüngzükdakjang ta sarasademtsür, ta kasa sangdong ajanga metetdaktsü.

# Advisor Kazheto-i Chief Veterinary Officer office semzüktsü



Chief Veterinary Officer & Veterinary Hospital, Tseminyu Office Complex semzükba mapang tangokba noksa nung angur.

**Dimapur, Chiteni/July 11 (TYO):** Chief Veterinary Officer & Veterinary Hospital, Tseminyu indang Office Complex July 11 nü Advisor, Animal Husbandry & Veterinary Services, Kazheto Kinimi-i semzüktsüogo. Iba sentong nung MLA & Chairman DPDB Tseminyu, Ar. Jwenga Se baser Tseminyu nung tanga ketdangsürtemi shilem agia liasü.

Sentong nung o jembiba mapang Advisor, Kazheto Kinimi-i, Department of Animal Husbandry & Veterinary Services-i nüburtem nem office complex ka agütsütetba atema kanga pelar ta ashi.

Paisa, nüburtem dang iba ki ya parnok meyong ama agizüktsü aser kümzüka ayutsü ayongzüka liasü. Advisor-i,

Nagaland nung dairy farming atema lenmang sadema lapoka aliba ya nüburtemi angatetsü nüngdakba lemsatepba den iba ajanga nüburtem nem mapa inyaksü atema maangka agütsütsü aser mamatzü, entsü, poultry, livestock aser meat production nung Nagaland tangar dak memetaloki alitsü, ta ashi.

Nüburtem dang dairy farming aser kiset shiruru metsütsü ajungshia Kinimi-i ashiba agi, district nung veterinary hospital ka ka amenoka aliba ajanga kiset shirurutem tali tajungba anepalutetsü aser iba ajanga rongsenketzüng jenjanga tajungba akümtsü.

Maneni pai ken o dak sendaka aliba ketdangsürtem, lokti lenirtem aser nüburtem

dang iba mozüki ya takok ngua inyaksangshiyonga aotsü atema department den teka amteper inyaksü mepeshia liasü. Advisor-isa, iba project takok ngua benoka inyakba atema department, engineering wing, contractor, MLA, Jwenga Seb aser taoba MLA & department Advisor R. Khing nunger nem tenüngsang agüja liasü.

Sentong nung okila Director Animal Husbandry & Veterinary Services, Dr. Achila Ao-i jembiba aser MLA, Jwenga Seb aser DC Tseminyu, Rohit Singh, IAS nati natia o tatsütsü jembiba liasü.

Iba sentong ya Dr. Gwathonlo Tsela, VAS Tseminyu lenisüba nung agi aser CVO, Tseminyu Dr. Kenalo Kath-i tepela o jembiba liasü.

# Kohima DC-i lenmang merektetsü tuyu

**Dimapur, Chiteni/July 11 (TYO):** June 11 nü Urban Development Department

sangdong dak ajemdaker Kohima jila telung aser temeket nung gari senzüsenpong sadema kümdaktsütsü atema Deputy Commissioner Kohima, Kumar Ramnikant, IAS-i, ki kibur aser dokan kiburtem dang kisüjensü dang amshiba oset, gari tejen mesüra tanga osettem dang senchi achintsü, ta paisa kwinaka lenmang tezülen yua lir

item ajak agintsü metetdaktsüogo.

DC-isa, gari senzüsenpongsü atema tetsükdaktsü agütsüba osettem ya osang agütsüba sülen anogo tenet tsüngda agintsü tetuyuba agütsüogo. Anogo tenet sülen ketdangsürtemi osettsüsettem agintsütsü aser temzüng ozüing dak ajemdaker aibelenertem dang senchi achintsü, ta paisa metetdaktsüogo.



Mokokchung, July/Chiteni 11(TYO): Asia Theological Association(ATA) nungi India Evaluation Team züngsem asem Dr.Vishwas Padole, Rev.Shaiju Thomas aser Rev.Dr.Rushulo Seb aruagi July 8 nungi July 10 tashi Nagaland Bible College monger ogo. Parnok anogo asem amongba mapang Nagaland Bible College Principal aser tesayurtem den külemi tangokba noksa.

# NCSU-i Diswang'er kinunger den asükhu lemsatep

**Dimapur, Chiteni/July 11 (TYO):** Nagaland Contractors' & Suppliers' Union (NCSU) Head Office Kohima sangdong ka ajanga, July 10 nü gari tsükokba lendong ka nung ajungbena N. Diswang Hau asüba osang angazüka züngsemtem ajak temulung kanga koremba lemsatepogo.

Asür Diswang Hau ya NCSU indang legal advisor liasü. Pa masü tashi NCSU Peren District Unit advisor liasü. Pa kanga nendaka inyakba aser ajemalu nisung ka liasü aser pa

asüba ya NCSU atema takoksa tulu, shiba obendang tajung ka liasü.

NCSU-i, pa kinungtsü, chirnur aser kinungertem den asükhu lemsateper, aser tulusang Tsüngremi parnok nem iba mangyim jashi khure koktettsü atema tashi agüjang ta sarasademja atar. Onokisa külem tenzüker tanüla teti tatem makadak anisüngzükdakjang ta sarasademtsür, ta NCSU tir Pele Khezhe aser General Secretary John Kath nati külem sangdong ka ajanga metetdaktsü.

**GOVERNMENT OF NAGALAND  
DIRECTORATE OF TECHNICAL EDUCATION  
NAGALAND: KOHIMA  
NOTIFICATION**

NO. DTE/ ESTT-2/02/2021-22/: In continuation to this office letter of even number, dated:9th July, 2024, the last date for submission of form for the State Reserved Seats in Engineering Under-Graduate Degree Courses is extended till 17th July, 2024, 4:00 PM. Form can also be downloaded from Department: website:- <https://dte.nagaland.gov.in>.

(Er. Vipulhouhoung) Director.

# Gaza aser Ukraine nung tai maketertem asüba magizükteter: PM Modi



July 11, 2024 nü Vienna, Austria nung India nungertemi Ato kilonser, Narendra Modi agizükdang tangokba noksa nung angur.

**New Delhi, July 11 (Agencies):** Ukraine nung süaka Gaza nung süaka mesüra tesem mashie nung süaka tai maket nüburtem asüba magizükteter, ta Ato kilonser Narendra Modi-i ashi.

Austria Chancellor, Karl Nehammer den senden amenba sülen Modi-i iba o ya jembia liasü.

Aso 19buba mapang Vienna Congress ajanga Europe nung yimjung atema lenmang sayuba bilemteta Ato kilonser Modi-i 2022 küm pai Russia Tir Vladimir Putin dang tang putu ya raraba putu masü, ta jembiba o lephsia jembi.

Modi-i, “Künati (Modi-Nehammer) Ukraine mesüra West Asia densema alima tesem balala nung tang teraradak tensa atema o lemtepa liasü. Ni tamalen jembiba ama, tang mapang ya raraba putu mapang ka masü. Tongbang raraba moapu nung tebilemsü onüktem bentetsü makok. Alima tesem mashika nung tai maket nisungtem asüba magizükteter,” ta ashi.

Paisa, tekaraba nung yimjung alitsü atema ken o jembitsü aser yimtenren tsütsülen nungi inyaksüji tongtibang, ta India aser Austria nati bangjemogo, ta

metetdaksü. “Iba nükjidong ataloktsü atema onoki (India aser Austria nati) akokba tashi amalitepa inyaksü melunga dang lir,” ta Ato kilonser Narendra Modi-isa metetdaksü.

Ano külen Austria Chancellor, Karl Nehammer-ia, “Switzerland nung peace summit aliba mapang nung lemtetba ama West aser Global South nati longjemer inyaksüla ta künati (Modi tenati) bangjemogo. Iba dak alia iba onük atema India-i tongtibang shlem agitsü akok. Ukraine nung rara ya anentsüla,” ta metetdaksü.

# Anogo ka kija nung UP nung tsüngi lendong nung nisung 38 süogo

**Lucknow, July 11 (Agencies):** Bodhbarnü Uttar Pradesh state tesem balala nung tsüngi agi nisung 38 aiseta süogo.

UP nung ayong aika nung tzü tali metsünga yimdar aser tzümetsüng agi nübur aika kongshir aliba mapang nung tsüngi lendong kanga bulua atalokdar.

Pratapgarh district nung tsüngi lendong nung nisung 11 asü, Sultanpur nung nisung tenet asü, Chandauli nung trok, Mainpuri nung pongu, Prayagraj nung pezü aser Auraiya, Deoria, Hathras, Varanasi aser

Siddharthnagar district shia nung nisung kaka tsüngi lendong nung asü.

Iba dak alia kasa district tem nungsa tsüngi agi nisung aika yiruogo.

Pratapgarh kübok region pongu nung nisung 11 tsüngi lendong nung asüba sülen tasümantemji postmortem agitsü atema bendena liasü.

Anüdoklen Uttar Pradesh kübok Chandauli nunga tsüngi lendong nung nisung aika yirua district hospital nung treatment tagidak lir. Iba district nung nikonngang 4 ako nungi nikonngang 6 ako tashi tzünglu

maneni aruba den külemi tsüngi kanga yaa liasü. Tsüngi yaloktsüba ajanga yirurtemji teimbaka alu nung alirtem mesüra ango tepuokdakpurtem liasü.

Sultanpur nung tsüngi lendong nung asürtem nisung tenet nungi asembo tanur liasü. Asürtemji alu nung mo atemertem, titi aongertem mesüra tzü atartem liasü.

India Meteorological Department (IMD)-i Uttar Pradesh aser temeket aliba state tem nung taruba anogo pongu tashi tzünglu maneni arutsü, ta metetdaksüogo.



July 11, 2024 nü New Delhi kübok slum area ka nung tzü metsünga aliba noksa nung angur.

# NEET Paper leak ken o nung CBI-i tongti aibelener Rocky puogo

**New Delhi/Patna, July 11 (Agencies):** NEET UG question paper leak asüba ken o dak sendakba nung Central Bureau of Investigation (CBI)-i tongti aibelener, Rakesh Ranjan Rocky puogo.

CBI-i Bihar kübok Nalanda nungi ‘Rocky’ apu.

Osang angazükba agi, Rocky apuba sülen Bihar yimtiba, Patna nung aliba court ka matsüngdangi pa anir ao aser anogo 10 nü CBI ket nung ayutsü atema agütsüogo.

NEET UG paper leak ken o dak sendakba nung CBI-i Patna aser Kolkata na nung tesem aika mita aoba sülen tesüsa Nalanda nung Rocky apu.

CBI team-i Rocky indang IP adress aser email address ajanga pa aliba tesem meteta liasü.

Osang angazükba agi, Rocky-i NEET UG question paper anguba sülen maneni ibaji prokshitsü atema pai “Chintu” ta ser nisung ka dangi yoka liasü.

NEET UG paper leak ken o dak sendakba nung tang tashi nung CBI-i nisung 10 puogo.

Tamalena CBI-i kasa ken o nung Jharkhand state kübok Hazaribagh nung aliba Oasis school nung principal aser vice principal na apu.

Tang tashi nung iba ken o dak sendakba nung FIR trok benoka lir. Bihar nungi FIR ji paper leaks indang dang lir. Tanünga FIR ji Gujarat, Rajasthan aser Maharashtra nungi lir aser itemji candidate kar melen kari tatidang agütsüba aser ashikülak inyakbatem indang lir.

NEET UG tatidang nung ochimashi jenti aliba nung ajemdaker iba tatidang July 18 nü agishitsü atema Supreme Court nem temepishiba agüja lir.

Taküm May 5 nü National Testing Agency-i ketdangsüa NEET-UG 2024 tatidang agia liasü. Iba entrance exam ya India tesem balala nung sorkar aser nija rejutem nung MBBS, BDS, AYUSH aser tanga medical courses atema admission asoshi agir.

Taküm iba exam ya yimti 571 kübok exam centre 4,750 nung alia liasü aser candidate lakh 24 jungnüai iba tatidang agüja liasü.

# CISF aser BSF nung constable post shilem 10 Agniveers nem agütsütsü

**New Delhi, July 11 (Agencies):** Brihostibarnü Central Industrial Security Force (CISF) aser Border Security Force (BSF) nung tongti ketdangsertemi, Agniveers nung tenzükertem nem central forces nung constable post shilem 10 wazüka yutsütsü, ta metetdaksüogo.

Yaküm Union Home Ministry-i Agniveers sepai nungi anisüngzüker alirtem nem central security forces nung menden shiteta yutsütsü, ta sangdonga liasü.

CISF director general, Nina Singh aser BSF director general Nitin Agrawal nati Agniveers sepaitem shimoktsü sentong tejangja metetdaksü.

Nina Singh-i, “CISF-i Agniveers nung tenzükertem nem constable menden shilem 10 agütsütsü. Union home ministry tetuyuba nung taoba mapang Agniveers shimtsü atema CISF-i inyakyim renemdar,” ta metetdaksü.

Ano külen BSF director General Agrawal-i, “Parnok (Agniveers) küm pezü experience ngur asütsü. Parnok tazüokba lir aser training agiba sepaitem lir. Iba ya BSF atema kanga junger, kechiyong onoki training agir aliba sepaitem angutsü. Training mapang tatsüka dang agiba sülenbo parnok arrtsüleni yoktsü,” ta

metetdaksü. Agrawal-i, “Training agütsüba sülen parnok nem mapa lemezüksütsü atema onoki parnok atadar. Menden tazüng shilem 10 bo parnok nem lemezüksütsü,” ta metetdaksü.

Tawa Parliament nung Agnipath recruitment scheme onük nung opposition aser sorkar na tsüngda o toktepa liasü. Iba scheme kübok Army, Navy aser Air Force nung küm ishika atema dang sepai nung shimmoker.

Opposition party temi iba scheme ya agienadoktsüla, ta akhanger. LJP aser JD(U) ama NDA teloktep nung densema aliba party temia iba scheme ya reprangshitsü akhanger.

Agnipath scheme ya 2022 küm June ita nung tenzüka liasü. Iba scheme kübok arrshi küm 17 ser tesadang nungi arrshi küm 21 purtem küm 4 atema sepai nung shimmer. Iba nungiagi parnok shilem 25 bo ano küm 15 tali tenzüksü atema shimshitsü.

Congress densema opposition party temi iba scheme aija, tanünga Agniveer shilem 75 ji kechi inyaksü, ta tasüngdangba kaa iba scheme aitsür.

Central sorkar agencies aser departments-a aikati taoba mapang Agniveers shimoktsü atema tebilemba aliba lemsatepogo.



## TIR YIMYIM YIMOBILEM (EDITORIAL)

DIMAPUR ROGONÜ, JULY (CHITENI) 12, 2024

### Nagaland nung ILP

**N**agaland dang masü saka India nung tang North East ta ajaba state-tem nunga tenem kintem, talisa, Naga, Mizo aser Arunachal nungertem alidak ya tangar tsümar nashishi aser akshi machiba kintem agi sünga amokbanger alitsüba agi tang tashi lisopurtem akhüm mesamadaktsüi aliba ya, tanga agi masü, British nung yimsüsüba mapang 1873 küm Bengal Eastern Frontier Regulation ajanga Inner Line ta ser lenden o tenem na tsüngda ar ladanga yutsüba ama ladanga yutsür, iba ar ladangba ajanga tenem kintem alidak temelaba melii shinga maotsü ozüng zünga yutsüba ajanga lir. Atangji, British nungertemi lenden nung aliba kintem tenem leni matutsü asoshi ozüng agi nokdangba nükjidongji tenem kintem meyong litzülilem aser sobaliba kümzüka yutsütsü asoshi liasü ta angateter. Ibaji kodang bilemdangdir, ashiko, British nungertemi Inner Line Permit amshitsüsa 1873 küm ozüng ya lateta meyutsüka asünungbo, Nagaland state yabo Dimapur ya dang masü saka yimtsüngtem tashi nung Naga nungertem dangbo tangar teimba senso kümer lila ta bilemer. Atangji, ILP amshitsü atema ar longbo azünga maka, anungji iba ozüng ya lisopurtem ajangzüksüsa mapa kuma amshitsübaji lisopurtem dak dang keta lir. Tanü Nagaland ta asüba state yabo 1947 küm India lima yimten nüchiso ngur külena 1963 tashibo Assam kübok district ama ka dang yur yimsüsüa liasü. Iba mapang tashi nungbo, tanü Assam aser Nagaland artsülen Assam lima kümer aliba lenden lima tesem aika nung Naga nung yim kümteta liasü aser süngo lu ayimertem nungia Naga nungertemi alimelen agia aruba otsü lir. Ajisüaka, Naga nung shisatsü nung main, temetetba mali aser tagitarutsü memetet ta aliba agi tangar lenden lima nung alirtem nem alushi tuluka meteta aser memeteti atsünga agidaktsüogo aser tanü Dimapur nungbo Marwari, Bihari, Bengali aser Muslim nungertemang ali aser rongsen kibur kümer asenok parnok kidang kinüker aser ita sen mechimenu agia mapa inyakertem kümogo. Ibayongji, Nagaland state kümer yimsüsü tenzük dangbo Muslim aser Kachari nungertem dang Dimapur nungibo MLA asüba Nagaland yimten otsü nung angutsü. Tanübo, assembly nung asüyonga mesüra Municipal Council nung asüyonga Naga nungertem dak alaka tanga kintemibo merakteper. Ajisüaka, Dimapur nung alirtem rongnung nütsüng apitep nungbo Naga nungertem dang nungibo tangar tsümartem teimba asütsü. Atangji, itemji teimbaka telidak purtem masü saka ayangertem asütsüa akok, ajisüaka tang amai ILP ozüng liaka mamshii zübazübaa toktsü nungbo küm 25 sülen 2050 nungbo Dimapur, Chümoukedima aser Niuland district-tem nungibo yimten yimsüsüba mendentemji tsümartemi agiadoktsü aser Naga nungerbero 'reservation' nungi dang shilem agia angur. Aji oda, tanübo Dimapur aser Niuland district ama indang dang shisabolua jembir saka Nagaland district ajunga nung Municipal aser Town Council area nungbo Naga nungertem dang nungibo tsümartemang teimba akümtsüsa kanga züina aoba angur. Tanü asenoki item tebilemstü ya süoki ia bilema ILP ozüng ya mapa kuma mamshitetra, atangji, küm 25 sülenbo tangariang asen lima nung asen dang ILP meshitsü. Yashi tashi ILP amshia maruba state Manipur ama nung tanübo ILP akangakanga amshir saka alemli British nung mapang nungi ILP amshia aruba Naga nung lima nungbo ILP ozüng mali amai kümogo. Atangji, ILP amshiba nükjidongji iba lima jagi shinga marudaktsütsü ta masü saka temelaba agir arutsü, anungji temelaba agir mapa balala inyaka ayanga alitsüa akok. Ajisüaka, ILP ajanga Nagaland nung arua alirtemji lisopur mekümteptsü, tetezü parnoki Nagaland nung ali kibur mekümteptsü. Tepila aser temetenji aji lir. Aji oda, asenoki tangar mapa inyaker medeni kisüjensüba mapa aika meinyaktettsü, anungji tangar bendanger mapa inyaker nübo tenüngdaktsübasa. Iba amaji alima ajak nung kati ka dak metaloktepa alir, ajisüaka ozüng ka kübok shingaia shinga mezüngmeshia mamokbangtsüsa alitsüa. Aji, lisopurtemi pei temeten aser tarutsü tia meteta inyak nung dang ataloktsü.

## OLEMSABANG

### TANÜ ASEN LOKTILIBA NUNG AJURUBA TEBILEMSTÜTEM

~ L.Kika Pongener.

*(Yashi adok nungi...)*

Lokti nung lennir ajaki asen tenzükba mapang tarutsü indang kanga junga shisadanger, mulungsentsü temeruk aser shisatsü tesadem agi mapa tajung inyaktsü merangtsüla. Aji oda, lokti nung lennirtemi tarutsü indang mebilemdangi, tanü asen ajung asaa, mesura tanü akoktsüba asaa, mesura ozü telok, par telok ta...telok kar taginüba aser mulongba nung tashiyim agi akoktsü merangra, iba jagibo lokti nung telongjem melena telemsa dang adoktsü. Ano lokti nung lennir ajaki kanga junga angatettsübaji, loktiliba ajungtsü asoshi kechi telemtetba agidir, tanü kechi tenzüka ayur, asüng-yanu iba nungji oa aremstü ta angateta, kanga junga bilemdanger dang ken o ajak lemtettsüla. Aji oda, lokti nung tarutsü indang meshisadangi tanü ajung asa-a telemtetba agira, ibaji tarutsü atema temettsükdaktsü long ka asütsü.

Ano lokti nung nubur azüoka liromedema ayutsü/anitsü asoshi temzüng-ozüng shidak lateta ayutsübaji kanga tongtipang, saka ano mapa kar/mapang kar nungbo, temzüng-ozüng shitak ayutsüba dang nungibo, nubur tsüngda nung mepetmesu/telemsa meli-i longjema alitsüba-jiang kanga tongtipangba sudaktsütsüla. Kechiyong temzüng-ozüng tesashi agi alenba agi lokti kaji longjema alir masü, saka kati ka akümtsüba, kati ka züngshia aliba agi dang loktiji sunepa alir. Ano ajak dang tentet tamajungtiba aser lokti telongjem raksatsüba küli tamajungtiba kaji...Takar, tular, tashi-tawar kar telong-tener (Syndicate), parnok mulongba nung dang lokti anitsü merangba, ken o telemtetba ajak agitsü merangba, mesura külem tenzük shinga ola madokdaktsüi tashiyim agi ajetbanger (Dominate) anitsü merangba, iba amala tentet tamajung jagi, loktiji temai madok telung nung yareta shirangdaktsür. Tesasatsüka, tanü loktiliba aika nung lennir/tenzük aikati yabo majunga/yabo tim masüa tabo ajitet/angaget, saka nungsen tsübuba agi ola madoki toktsür...Aser ibajagi lokti kaji yareta shirangdaktsür. Anungji lokti nung lennir/tenzük ajaki tim masüba nungbo, nungsen metsübai yabo tim masüa/majunga ta tasü-ita shitettsüla. Lennir kaji menden tazüng mayutsü tapok-adanger ka dangbo masütsüla. Asen tenzükba mapang nung, tentet tamajung kar tenzüka yura, ibajagi lokti longjema aliba raksatsütsü. Anungji asen lennisuba/tenzükba mapang lokti nung telemsa madokdaktsütsüsa kanga shisa kaa anitsüla.

Ano nubur madak lennirtemi metettsüba kanga tongtipang kaji...Nubur madak lennir ka pa adentsüla/madentsüla aser tebang aitsüla/maitsüla ajak nung dena/teka amuoka shilem magitsüla. Nubur madak lennirbo...Nutsüng-nubur tanak-temesung ajaki akümtsübuttsüsa ajak tsütsü küsasa (Neutral) asütsüla. Nubur madak lennir (Public leader) ka nuburi tetla-tetshi masütsüsa meraket-keta ajak den yimjung asütsüla. Ano lokti lennirtemi angatettsü tongtipang kaji...Lennir kaji lokti tekolak menudaktsüba lennir ka masütsüla. Aji oda, lennir ka pa/la mechi aiben lokti nung ken o bulua, lokti tekolak menudaktsütsüsa litetra nubur tsüngdang sentsüh asütsü. Lennir shiba sudir suang...Kechi koma-ka lennitsü sempet tajung liaka, kechi koma-ka shia-meteta liaka...Pa/la mechi lokti nung ken o bulua lokti tebilemstü kaadaktsüra...Pa/la-ji alima aser nubur asoshi tetemstü lennir ka masü. Ano lokti nung tenzük shinga-ia telok-telok tenung jateta lemsatsüsa ken o tapu-tapu purapojia, lokti nung mepetmesu adoktsüsa 'Issue' meyanglutsüla. Ajak dak alia, lokti nung lennirtem sen/supokrem nung malangtsüla. Lokti ka longjema aser tashi-ita anitsü atema ken o telemtetba agiba ya kangasa tongtipang. Ano lokti nung tentet tamajungtiba kaji...Yimden ken o yimden sabang/ unger kilang nung masü, saka kipok nung atsükshishia telemtetba agira...Ibajagi lokti kaji kecha jenjang mali anula-anulaa kümdaktsür. Ano lennirtemi metettsüba kangasa tongtipang kaji...Lokti nung ken o telemtetba agidang, asen jakdang tenzükba arur tejenpur lennirtem mapang atalokba aser telemtetba agiba-a meyipa reprangdangtsüla. Ano asen jakdang tenzükba arur lennirtem nungia shisatsü agitsüla. Aji oda, ochi/shitak ya tapu ana lir...Ochi/shitak kabo Tsüngrem tsüngdang ochi/shitak lir...Saka ano ochi/shitak kabo sen/supokrem agi tebang nembangtsür/tenuk pokdaktsür ochi/shitak mesuka yangluba-a lir. Aiben asen lokti nung nisungi yangluba ochi/shitakba nungji ajemdaker ken o lemteter/alangdanger. Tsüngrem o-i ashir..."Nisung tsüngdang shitak mesukba lenmang ka lir, saka iba lenmangji tasüba lenmang" (A.Shin-16:25). Anungji lokti nung Tsüngrem tsüngdang ochiba/shitakba nung dang ajemdaker ken o ajak telemtetba agitsüla aser obendang agütsütsüla.

*(Maneni asüng adok nung...)*

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

## Missionary Graham Staines tepsetsangi Jail nungi chioktsü mepishir



Australia nunger missionary, Graham Stuart Staines den par jabaso ana-Philip aser Timothy nunger abelen noksa nung angur (file photo). Ajchilen noksa nung Dara Singh noksa angur.

**New Delhi, Chiteni, July 11 (Agencies):** Küm 24 tejaklen (1999) Odisha state nung Australia nunger missionary, Graham Stuart Staines den par jabaso ana tepsetba ken o nung aibelenangi Supreme Court dang temerenshi obendang ajema kümja pa jail nungi chiokang, ta temepishiba ken o ka agütsüogo.

Pa jail-i aiba sülen küm 24 jungogo aser pai akhidang aibelenba atema sasar, ta SC dang ashi.

1999 küm January 22 aonung Odisha state kübok Koenjhar district nung missionary Graham Staines aser par jabaso ana- Philip (arrshi küm 10) aser Timothy (küm 6) nunger gari ka nung lia gari nungji mi senoktsür rongseta südaksüba ken o nung Dara Singh aitsüba sülen pa taküm piyong tepuokdak ayutsü obendang agüja liasü.

Dara Singh (Rabindra Pal Singh) ya Hindu telok Bajrang Dal nung züngsem ka lir. Pai Supreme Court dang, pa lanur asüandang pai tejashi nung ozüng alema iba aibelen inyak, ajisüaka tangbo pai temelung meyiper, ta metetdaksü.

2022 küm Supreme Court-i taoba mapang Ato kilonser Rajiv Gandhi tepsetba ken o nung aibelenertema anojungi mapang matongdangyongi jail nungi chioka liasü.

Dara Singh-i Supreme Court nem temepishiba ken o agütsüba sülen Justices-Hrishikesh Roy aser S. V. N. Bhatti nati akümba Supreme Court bench-i Odisha sorkar dang Singh-i agütsüba temepishiba ken o dak sendakba nung hopta trok tsüngda court nem telangzüba agüjang ta tuyuogo.

Tang Odisha state nung BJP sorkar lir. India kübok state sorkartemi ken o balala nung aibelenba jail nung puoka alirtem temerenshi ajemja kümsük matongdang jail nungi chioktsü atema telemetba agia inyaktsü akok.

Bajrang Dal ya-a BJP pusemba Hindu teloktem rongnung densema lir.

Odisha nung Cuttack-Bhubaneswar archdiocese nungi putir, Dibakar Parichha-

i, "Supreme Court-i Singh temepishibaji magizüktsüa akok, kechiyong pai aibelen tuluka inyakba dang masü saka nisung tepsetba ken o asem nunga pa aija lir," ta metetdaksü.

July 10 nü osangbener den jembidang Diibakar-i, "Pa anojungi jail nungi chiokba ajanga tatishitsü tamajung ka tentetsü," ta ashi.

Parichha-isa, Dara Singh-i arrshi küm 35 putir, Arul Doss-a tepset, ta ashi.

Dara Singh leniba nung telok kati lasang amshia Catholic missionary, Doss amak aser yimdak pa indang mission house nung pa tepset, ta metetdaksü.

Tang arrshi küm 61, Dara Singh ya mezüng 2000 küm January ita nung apuba sülen 2003 küm trial court kati missionary Staines tepsetba atema Singh nem tasüba temerenshi obendang agüja liasü, saka küm ana lir Orissa

High Court-i iba temerenshiji ajema kümja taküm piyong tepuokdak ayutsü obendang agütsü.

2007 küm Mayurbhanj district nung court-i missionary Doss tepsetba ken o nung Dara Singh den nisung asem taküm piyong tepuokdak ayutsü obendang agütsü.

2007 küm October ita 27 nü court kati Muslim nunger shishilembar ana tepsetba ken o nung Dara Singh taküm piyong tepuokdak ayutsü obendang agüja liasü.

Missionary Graham Staines-i küm 30 tashi Odisha nung leprosy agi shirangertem yaria aru.

1999 küm January 22 aonung pa den par jabaso ana gari nung kidangi shilangba mapang lenmang tom nung amoi oa alidang Manoharpur yimdak Dara Singh leniba nung telok kati gari nungji petrol shiloktsüba sülen mi senokja liasü.

## ANOGO ABEN TSÜNGREM DEN

### Temoatsü agizükba

"Koda, asenokbo Tsüngrem ket nungi tajung dang agizüker tamajungbo magizüktsü asü?"

Yob 2:10

Aikati yob ji taremzüc nisung ka ta bilemer. Saka iba dang nungi tali Pa lir. Pa rongsen tulu akaba nisung ka liasü. Pa tekümdang, mapa meranga inyakba, aser tashi angaba agi Tsüngremi Pa moatsü asü? Asenoki memetet, Pa san 7,000, ut 3,000, nashi pungchi 500, aser gado 500 liasu ta asenoki Yob kaket nungi angazüker (1:3). Pa ano sarasademba taküm ka liasü (1:5). Tsüngremi satan dang Pa akaba ajak aser chirtem agitsü temelaba agütsüra, Yob telangzübaji Pa tiyongtsü masü, saka tsüngrem tiyongtsü liasü: "Kibubai agütsü aser Kibubai bener aor.

Kibuba tenüng temoatsü süang" (1:21). Kodang Satani pa temang nung kongshi tebuttsüi Tsüngrem indang asüngdang. Yob telangzübaji Khristantem asoshi lesson tajung ka lir." Asenoki Tsüngrem nungi tajung dang agizüker tamajungba magizüktsü asü?"Aikati Yisu Khrista Kibur aser Kümtetdakba ta agizükra timtem kecha agia matongtsü amai bilemer.

Saka shidakba nung yamaji masü. Ken kenbo asen tamang den mesütep ataloker.Pauli ashir, " Khrista nung temeshiba alitsü meranger ajak rishikangshitsü" ( 2 Tim 3:12). Tsüngremi asenok nem kanga moatsür aser Pa temoatsütemji ka ken ka ken ta züngdangbaji Khristan ka teinyaktsü lir. Asen tamang aser jakla Tsüngremi tendanger. Asenoki Pa temoatsütem agizükba ama Pai tentangbajia agizüktsüla. Aser itemji ajanga otettsü asoshi asenoki Pa dak metaloka alitsüla.

Tsüngrem, Nai ni kanga moatsüogo. Ne temoatsütem agizükba ama Na nungi aruba tatitang agizükttetsü kü tamang ulua kümdakjang.

## United Methodist Arogo nung pastor ana gari lendong nung asü



Rev. Charles Layton (65) aser Rev. Carol Mart (77) na noksa nung angur.

**July 11, 2024:** Taoba Amongnü Bertram, Iowa nung United Methodist Church (UMC) nungi pastor ana gari lendong nung asüba sülen Arogo aser kinüngertemi mangyimdak, ta osang ka ajanga metetdaksü.

Arrshi küm 65 Rev. Charles Layton aser arrshi küm 77 Rev. Carol Mart na Veterans Memorial Building, Cedar Rapids nung külemi tekülem sentong ka nung adenba sülen kidangi meyipa aodang iba

lendong ataloka liasü.

July 7, 2024 nü (Amongnü) nikongdang 1:00 ako meta Blaine's Crossing Road nung Highway 13 ajangdanga aoba mapang nung tena mena aliba gariji tanga gari ka den tsüktep, aser iba tesem nungjisa pastor anaprong asü.

Rev. Layton-i Asbury aser Kenwood Park United Methodist Arogo na nung tenzüka liasü aser Rev. Mart-i Buffalo United Methodist Church nung tenzüka liasü.

Pastor ana jagi gari ka nung dang tenaprong külemi tekülem sentong nung oa adentsü lemteta liasü. Tekülem sentong tembangba sülen tena külemi chiyung aser kidangi meyipa aodang iba lendong ya ataloka liasü.

St. Paul's United Methodist Church nung Pastor Jonathan Heifner-i social media ajanga, "Iba osang ya kibongtem, ministry nung külem tenzükertem aser tena inyakba Arogotem atema taoktsatsü

osang ka lir. Pastor ana aser tena meimertem ajak sarasadem nung bilemtetang ta mepishir. Tenapronglai onok Circuit ministries nung shilem tulu agiogo aser külem tenzüker ka ama ni tenaprongla menungratsü," ta metetdaksü.

Lovely Lane United Methodist Church nung pastor aser Cedar Rapids United Methodist circuit nung lenir, Scott Meador-i, pastor anaprongla tasütait liasü aser tenati peipei Arogotem kanga meima liasü, ta metetdaksü.

"Tenapronglai par santem kanga meima liasü aser parnokia tenaprongla kanga meima liasü," ta pastor Meador-isa metetdaksü.

Asbury nung Leadership Team nung züngsem, Chuck Johnson-i Rev. Layton-i ministry nung shilem tulu agiba lemsatapa, "Pa ya kententsü meimba minister ka liasü. Pai akok tashi choir nunga aden. Methodists ajaki inyakba ama pa dak-a temeim liasü. Pai Tsüngrem O kanga jungasa jembi. Pa kanga ajemaluba nisung ka liasü," ta metetdaksü.

**AO OSHI ANGAZÜKDAK:  
TANÜ ANGAZÜKTSÜBA OJANG**



**Tajemzük**

(adj) pi kübok aliba tia, sensak tia ( downtrodden)

\* Tajemzük tia nung alirtem asoshi asenoki ola adoktsüla.

**Tajenba**

(n) kasa ka ajenoktsüba (seal)

\* Telok shia tamaitüsü tajenba kaka alitsüla.

**OLONG PAITEP # 6843**

	1	2		3	4	5
6					7	
			8	9		
		10				
11						
			12			
13	14	15				16
17					18	

**TIPLIN**

- 1. Inyaker ajangtetba - (3)
- 3. Bangsemo adokdak - (5)
- 6. Shitak mesüi inyak - (7)
- 7. Ya mimong nung angur - (3)
- 9. Reprangzük - (4)
- 10. Tasola - (5)
- 11. S \_ \_ \_ \_ - (4)
- 13. Yagi ajak ashioxtsür - (3)
- 15. Ki aokba oset - (7)
- 17. Ak shi nung inokba tasen - (5)
- 18. Ishika - (3)

**LANGTSÜNGLEN**

- 1. Meshidak - (3)
- 2. Tanaben soshir - (7)
- 3. Iba anogo - (4)
- 4. Meshi - (3)
- 5. Yagi mi tsükloker - (9)
- 6. Shi tapu ka - (9)
- 8. Yagi ayimer saka ozü masü - (3)
- 9. Ajokba shiruru ka - (7)
- 12. Inyaktet - (4)
- 14. \_ \_ \_ hi - (3)
- 16. Akümüli nungi pilar - (3)

**OLONG PAITEP # 6842 TELANGZÜBA**

**TIPLIN :**

- 1. Telok, 4. Aluru, 6. Ozüing, 8. Emk,
- 9. Kin, 10. Teti, 12. Süir, 13. Jen, 14. Ola,
- 16. Talak, 17. Mazük.

**LANGTSÜNGLEN :**

- 1. Tenükjang, 2. Luden, 3. Kioktsü,
- 5. Lenti, 7. Tajangzük, 11. teronem,
- 12. Sempa, 13. Jahaz.

**NAI-A YA METETTER MA**

**1960 NUNGI 2016 TASHI NUNG UEFA EUROPEAN CHAMPIONSHIP YAMAI :**

Year	Winner	Score	Runner-up
2024	2021 Italy	1-1 (a.e.t.), (3-2 p)	England
2016	Portugal 1-0 aet		France
2012	Spain	4-0	Italy
2008	Spain	1-0	Germany
2004	Greece	1-0	Portugal
2000	France	2-1 asdet	Italy
1996	Germany	2-1 asdet	Czechia
1992	Denmark	2-0	Germany
1988	Netherlands	2-0	Soviet Union
1984	France	2-0	Spain
1980	West Germany	2-1	Belgium
1976	Czechoslovakia	2-2 aet / (5-3) ps	W/Germany
1972	West Germany	3-0	Soviet Union
1968	Italy	1-1 aet / 2-0 replay	Yugoslavia
1964	Spain	2-1	Soviet Union
1960	Soviet Union	2-1 aet	Yugoslavia

aet = after extra time  
 asdet = after sudden death extra time  
 ps = after penalty shootout

**"Work permit" asadanga aoba ya ozüing alema lir: CM Sangma**



"Work permit" asadanga aoba ya ozüing alema lir ta Meghalaya CM Sangma-i ashi.

**Shillong, Chiteni/July 11 (Agencies):** Pressure group tem anema Meghalaya sorkari jenjang tapet magir ta ashiba Chief Minister Conrad K Sangma-i aitsüogo.

Item teloktem anema sorkari jenjang agiba indang osang shitak magütsüba atema CM-isa media aitsüogo.

Temetetsü kaji Meghalaya nung lokti tentet balalai kiojen balala yanglua aliba tesem semdanga tanga state nungi aruba aayangertem indang kuli kaket asadanga arudar.

Ken o kar nungbo item aayangertem karbo kidangi meyipa yokogo aser ano mapang kar nungbo item aayangertem

dak züka merenshiba dena osang angazükogo.

Iba ajanga aayangertem yirutsü aser tasüa süogo, saka police-i jenjang tapet magi ta media osang kar ajanga sangdonga liasü.

Shillong nung lokti tentet balalai kuli kaket asadanga aoba dak sendakba nung CM Sangma-i, state nung work permit system kecha benoka mali ta ashi.

Iba melena aayangertem parnok kümzuka toktsütsü aser kuli tejanga mangaoka ayutsü atema Labor Department-i parnok züingoksema ayur.

CM-i ashiba agi, kuli kakettem asadanga aotsü atema

kija aser lokti kecha nema temelaba agüja mali aser iba inyakyim ya ozüing alema lir.

"Item teloktem ya temzüing ozüing anema inyaksangshir," ta Sangma-i ashiba den item lokti tentet balala anema ken o pezü benokogo, ta ashi.

Khasi Students' Union-i ashiba agi, sorkari Inner Line Permit (ILP) aser Meghalaya Residents Safety & Security Act (MRSSA) mebenokba ajanga parnoki iba jenjang agi.

Sangma-i ashiba agi, ILP ya state sorkari mebenoker aser MRSSA koba Ministry of Home Affairs dangi yoka liasü iba ya meyipa yokogo aser state sorkari tang asadangshidar.

**Dibrugarh nung lanur telok kati nisung ka tepset**

**Dibrugarh, Chiteni/July 11 (Agencies):** Assam nung Dibrugarh district kübok Alubari tesem nung lanur telok kati arishi küm 24 tain nisung ka tenüing agi Kamal Sonar tepset.

Iba lendong ya ozüing alema yi ayokba dokan ka anasa ataloka liasü.

Iba nisungba tepsetba dak sendakba nung police-i Deepjyoti Rajbanshi puogo.

Local source temi ashiba agi, Rajbanshi aser Sonar na mapang talangka nungi tsükchitepa aruba ajanga iba ya atalok asütsü akok.

Tenük kuli agütsürtemi ashiba agi, lanur 12-i Kamal dak kanga mejungi züka yiruja liasü.

Kamal kanga mejungi yirur

Assam Medical College and Hospital (AMCH)-i anir ao saka temang anepalua aliba mapang süatok.

Iba tesem nung alir kati ashiba agi, "Kamal Sonar ozüing alema yi ayokba dokan ka anasa lanur telok kati tepseta liasü. Deepjyoti Rajbanshi aser Kamal na mapang talangka nungi tsükchitepa liasü ta temulung melemer bilemer. Pa dak kanga mejungi züka yirutsü. Pa AMCH-i anir ao saka mapang tatsüka lir süatok."

"Ni kübuba atema ochi obendang aginer. Pa lanur telok kati taochi makai tepsetogo. Kibong nung pa kija mapa inyaka liasü aser ni ozü tanur ana koda anepalutsü memetet.

Alubari nung ozüing alema yi ayokba junga maziükba ajanga iba ya atalokogo. Police-i jenjang agia item dokantem shibangtsütsüla," ta lai osangbenertem dang ashi.

Barbari police outpost-i iba dak sendakba nung ken o ka benokogo aser bushisüing dang tenzükogo.

Police ketdangsür kati ashiba agi, "Kamal Sonar yasüing yi ajemi ao, kong Deepjyoti Rajbanshi aser par telok liasü. Parnok tsüingda mangatettep adokba sülen iba telok yagi Kamal dak kanga mejungi azük. Pa mozükidangi anir ao saka tia maka temang anepalua aliba mapang süatok."

**GOVERNMENT OF NAGALAND  
DIRECTORATE OF HEALTH & FAMILY WELFARE  
NAGALAND:: KOHIMA.**

**No.DHFW-5/D.Pharm/Part-II/2014/ Dated, Kohima th July' 2024**

**ADVERTISEMENT**

As per Government Approval Vide Order No.HFW(A)PHARM/12/37/15(PT)/245/Dated, Kohima the 9th July 2024 invites interested local candidates to undergo Diploma in Pharmacy course for the academic session 2024 at RIPSAT, Agartala. The last date for submission of application form 18th July 2024. Short listing criteria and other details are as follows:

- 5 (Five) Nos. of Seats available.
- Applicant should have cleared HSSLC (10+2) in Science Stream with minimum 45% in case of SC/ST candidates (English as one of the subjects and Physics, Chemistry & Mathematics (PCM), Physics, Chemistry, Biology (PCB) or any other qualifications approved by the Pharmacy Council of India.
- All relevant documents: HSLC & HSSLC Admit card, Mark sheet, Certificates, SC/ST Certificates, Indigenous Certificate, one recent Passport size photo, should be enclosed along with the application with complete address and contact no.
- The maximum age limit is 25 years on or before 1st June' 2024.
- Application Form can be downloaded from the Department website: nagahealth.nagaland.gov.in
- Last date of submission of Application forms will be on 18th July 2024. Duly filled in application in hard copy along with requisite supporting documents should be submitted in Room No.210 (Training Section) along with Rs.200/- as processing fee.
- Selection will be done based on Academic Merit Marks.

Sd/-  
**DR. E. MOTSUTHUNG PATTON**  
Principal Director,  
Directorate of Health & Family Welfare,  
Nagaland: Kohima.

## Israel-i Gaza City nung alir ajak ainshitsü ashir China nungger tayimtsü 66-i Taiwan lungbang

**Gaza City, Chiteni/July 11 (Agencies):** Israel mitkar temi Gaza City nung alir ajunga dang central Gaza Strip leni aotsü ashir.

Tayimtsü nungi leaflets tsükdaktsüba nung Gaza City nung alir ajak “dangerous combat zone” yutsür Deir al-Balah aser al-Zawaida nung tejenokdak aliba tesem leni lenman ana nung aotsü shia liasü.

Iba tesem nungi ainshitsü totuyuba agütsüba atema khuret abener ta UN-i shiogo. Gaza City ajunga azüngtetsü asoshi rara tenzüker tan agi tanaben ashir alitsü.

Tesüiba hopta ana tsüngta Israel sepaitemi Hamas aser Palestinian Islamic Jihad fighters tanaben adenshir ta bilemba district aikati tanaben ai.

Yimti nung Israel asendenshir inyaksangshiba ajanga ceasefire alitsü aser pua alirtem chiocksü atema Bodhbarnü nungi tenzüksüba Qatar nung jembishinüba raksatsü ta Hamas-i ashir.

Iba jembishinü nungya Egypt, US aser Israel itdangiter tekolakpur aser

Qatar indang ato kilonser adener.

“Israel-i bomb tali poklokja, nüburtem tesem balalai prokshidakja aser nisung jenti tepseta jembishinüba nung tebilemstü agütsütsü meranger,” ta Hamas ketdangsür Hossam Badran-i ashir.

Gaza City nungya tang tashi nisung million quarter ka dak tali alir südi ta asadangteta lir. Nisung karbo Israel mitkari leaflets tsükdaktsüba sülen ainshiba nguogo, koba totuyuba agütsüba masü tebilemba shidangba lir ta Israel ketdangsür kati ashir.

Ajisüaka aikati iba yimti yutsür aotsü memulunger.

“Ni Gaza City yutsür maotsü. Dangari tamachi mapa inyaka aibelenba ama ni meinyaktsü. Israel indang missiles yagi north aser south mebandangteter. Asütsü ya ni aser ozü tanurtem tia asünungbo ozü kidang tushia aser ochishia asütsü,” ta Gaza City nung alir arishi küm 47 tain Ibrahim al-Barbari-i ashir.

Bomb tanen makai pokloktsüba ajanga pei ki

yutsür moteter ta iba yimti nung alir kari onok dangi call süogo, ta Palestinian Red Crescent ajanga ashir.

“Gaza City nungi osang aruba ajanga yangji nüburtem timtema aliba sayur. Israel sepaitemi nisung aliba tesemtem nung maneni amaker, aser nüburtem pei kodang asr refuge shelters yutsür aor,” ta ashir.

Israel Defense Forces (IDF) ajanga Bodhbarnü sangdong ka nung par sepaitemi Gaza City nung UN agency for Palestinian refugees (Unrwa) indang headquarters ka telung nung aliba Hamas aser PIJ fighters anema counterterrorism operation agi ta ashir.

Gaza nung October 7 nü nungi tenzüka Israel sepaitemi amakdang nisung 38,295 dak tema tepsetogo aser yangji civilian aser combatants tsüngta mebandangteter saka parnoki April ita tatem tashinung tila tanur, tetsür aser teintet rogo 14,680 jangjateta lir, ta yangji aliba Hamas meyong health ministry ajanga ashir.

**Taipei, Chiteni/July 11 (Agencies):** Beijing-i anasa aliba tzüym nung exercises agir ta Taiwan indang defence ministry ajanga shir anogo ka lir ghonda 24 tsüngta iba asetkong meketa Chinese military aircraft 66 putet ta Brehostibarnü ashir, koba taküm küm timtiba alitsü.

China-i anogoshi amai Taiwan temeket nung mitkartem yoker aser pei sasa yimsü asüba asetkong ya par litsü nung shilem ka ta züngshir aser parnoki iba asetkong par küboki aiddaktsütsü asoshi tashi mamshitsü ta kodanga mashitsü ta shia lir.

PLA aircraft carrier Shandong den exercises agitsü atema western Pacific leni maodang asetkong meketa Chinese aircraft tem Taipei-i ajiteter anogo ka lir Brehostibarnü iba ya atalok.

“Tanep 6:00 ako tashinung Taiwan temeket nung PLA aircraft 66 aser PLAN vessels tenet aliba putet,” ta defence ministry ajanga Brehostibarnü sangdong ka nung ashir.

Chinese aircraft 56-i Taiwan Strait tiyongi sadangba median line alema ao – koba China aser iba asetkong sadangba tzü lenmang kilometre 180 lir.

Parnoki illustration ka sayuba nung tayimtsü ya Taiwan indang southern tip

tsütsü 33 nautical miles (61 kilometres) tashi arua liasü.

Taküm May ita Beijing-i Taiwan meketa military aircraft 62 aser naval vessels 27 yoka liasü.

Ibaji Taiwan Tir Lai Ching-te inauguration mapang liasü, shiba Beijing-i lendong aketba separatist ka ama züngshir.

Bodhbarnü defence minister Wellington Koo-i ashiba agi Shandong ya Bashi Channel ajanga mao, koba Taiwan indang southern tip nung lir aser Pacific Ocean leni China nungger rong aodang iba tesem ya ajanga aor.

Iba melen parnok ya Western Pacific tsütsü Balintang Channel ajanga ao ta ashir, koba Philippines indang Babuyan Island north anasa lir aser Bashi south tsütsü kilometre 250 shi pilar lir.

Kidanger linük Japan-ia Mongulbarnü Shandong ya densema PLA navy vessels pezü Miyako asetkong southeast tsütsü kilometres 520 pilar aor ta ashir.

China-i Taiwan temeket nung yimtenren aser mitkar tsütsü tali merametenba tang timba angur.

Taoba küm September ita nunga Beijing-i Taiwan meketa warplanes aser aircraft 103 yoka liasü.

## NATO-i Ukraine nem sen billion \$43 jenjang teyari agütsütsü nangzük

**Washington, Chiteni/July 11 (Agencies):** Russia den raraba nung defences tashi itshitsü mechi taruba küm tashinung NATO lenirtemi Ukraine nem sen billion \$43 jenjang military aid agütsütsü nangzük aser Kyiv ya Western military alliance nung züngsem akumtsü asoshi melenshitsü makokba lenmang nung lir ta sangdong.

Iba tenangzükba ya Bodhbarnü Washington, DC nung NATO senden amenba communique tatembangba nunga dena lir aser Ukraine aser Europe indang security tashi itshitsü asoshi alliance züngsem kija aser külemi mera agitsü sangdongba mapang ka nung nangzük alitsü.

Item rongnung United States, Netherlands aser Denmark linük temi NATO-i agütsüba F-16 fighter jets mezüngbuba ya taküm meyi mapang tashinung Ukrainian military pilots ket nung alitsü sangdong. US-i Germany nung 2026 küm longer-range missiles tem yoktsü ashir, aser ibai Europe asoshi Russia ya tebilemstü tulu akumba asoshi tongtipang mera ka lir, ta allies temi ashir.

Iba mera yagi Cold War sülen European continent nung US nok-nü tesashi amenokbaji Germany ya akumtsü. Iba ya US aser Soviet Union tsüngta 1987 küm zülutepba Intermediate-Range Nuclear Forces Treaty ajanga nokdangla, saka iba ya 2019 küm raksa.



NATO Secretary General Jens Stoltenberg

Ukraine Tir Volodymyr Zelenskyy-i social media X nung NATO ajanga par air force tashi itshitsü merangba atema pelaba lemsatop aser fighter jets tasen yagi yimjung anasai bener arutsü aser kiralongra mapa inyaker temi tamakok ajurutsü ta sayur alitsü, ta ashir.

NATO yagi Ukraine nem F-16 den ano air defence systems aika agütsütsü nangzük lir ta ashir.

Talisa US-i Ukraine nem Patriot missile systems pezü agütsü mulungogo aser danga NATO züngsem temi item system anepalua amshitsü teyari agütsütsü.

Alliance ajanga sangdong ka agütsüba nung “Ukraine tarutsü ya NATO indang lir” ta sangdong aser NATO züngsem densema Euro-Atlantic integration asoshi melenshitsü makokba lenmang nung Kyiv

maneni yaritsü nangzük. Ajisüaka Allies temi mulungtepa nungdakba ajak periba sülen ang jaoktsü, ta ashir.

NATO Secretary-General Jens Stoltenberg-i Ukraine ya tangsa tangbo alliance indang ranks nung madentsü saka tarutsü nung Russia-i Kyiv dak tanaben memakdaksütsü mechi rara atemba sülen ang ataloktsü ta nenshia ashir.

NATO ajanga teyari agütsüba indang jembidang, “Rara atsülangdaktsünüba ajanga onoki ya inyaker masü. Rara ya akok tashi tekeratiba nung tembandaktsünüba ajanga onoki ya inyaker,” ta pai ashir.

Tensa tamajungba kuma rara tuluba mekumdaktsütsü mechi Russia den raraba mapang US aser danga linük kari Ukraine nem züngsem agütsütsü memulungi liasü.

Ajidang masü ochimashi azüoktsü aser danga temelenshi arutsü atema Ukraine-i mera tulu agitsüla ta parnoki shia lir.

NATO sangdong nungsa China asoshi tesüiba mapang jembiba ojang akangshia iba linük ya Russia-i Ukraine nung raraba nung yarisemer ta aja aser Beijing dak Euro-Atlantic security asoshi timtem maneni lir ta ashir.

Russia rara nung China ya “decisive enabler” ta 32 allies külemi tenüng jaloktsüba tang mezüngbuba lir aser ibai tongtipang osang ka lir, ta Stoltenberg-i osangbener dang ashir.

NATO ya temerenshi agütsüba lokti tentet ka masü, ta pai ashir saka “Tatem nungbo kijai telemtetba agitsü, saka iba senden nungi NATO ajanga sangdongba kanga jangjar,” ta ashir.

November election nung Republican presidential candidate Donald Trump-i takok ngura US-i alliance yariba anentsü akok asü, ta asüngdang dang Trump tenüng metetshii “US-i alliance aitsüba ya NATO atema masü. Ibai NATO allies temi NATO nung sen peria meindokba asoshi lir. Aser ibaji melenshiogo,” ta NATO tekolakbai langzü.

Gross domestic product (GDP) shime ana bosa mitkar dak indoktsü ta alliance indang nükjidong aliba ama meinyakra Russia-i NATO züngsem dak amakdang meyaritsü ta Trump-i maneni amokmerener, saka 2021 küm züngsem linük trok-i iba target tonga aliba tangbo linük 23 kumogo.

“United States taginüba angatetogo. Allies temi inyakogo,” ta Stoltenberg-i ashir.

Fox News Radio ajanga Trump dang US ya NATO nungi ainshiner asü ta ishíben asüngdang dang, “Masü, parnok nem par sentsüh menokdaksüner,” ta pai langzü.

Ajisüaka Biden-ibo “Asenoki NATO litsü inch ajak kumzükä yutetsü aser ayutsü aser asenok külemi inyaktsü,” ta ashir.

NATO züngsem linük 32 nungi lenirtem den Pacific partners Australia, Japan, New Zealand aser South Korea aser ano Ukraine lenirtem senden ya Biden asoshi US election masüdang international forum nung nokdakba tatembangba asütsü südi ta amanger.

## Copa America: Colombia-i goal 1 agi Uruguay koka final-i iogo

**Chiteni/July 11, 2024** (Agencies): Bodhbarnü Copa America semifinal tanabuba nung Colombia-i goal 1-0 agi Uruguay koka final-i iogo. Küm 23 sülen Colombia team tang mezüngbuba final tongtetogo.

Asaya mezüngbuba shilem nung minute 39buba nung Jefferson Lerma-i ball ka kanga junga tongokja goal idaktsüba sülen Colombia-i iba asaya koka liasü. Parnok Deobarnü Miami nung final nung iba asayamung tesüsabuba koker aliba team Argentina den asayatsü.

Fan tem sünga adenshir lia iba semifinal asaya ya ground nung asayartem tsüngda mangatettep adokba, stands nung raratepba aser asayartem aika supporter tem mena aliba tesemi jokoka ia raratepba tembanga liasü.

Asaya mezüngbuba shilem matem tsüngda Colombia nung Daniel Munoz nem red card ka agütsür asaya nungi tugudaktsüba den Uruguay-i kanga nongshia asayaka parnoki takok tashi goal machitsü atema meranga asaya-a iba asaya kokogo.

Iba asaya akokba sülen

Colombia team asaya 28 tashi khen danga tamakok mongui asaya arudar, koba team asoshi otsü tasen ka asütsü.

Asaya nung Uruguay team-i goal idaktsütsü atema kanga meranga asaya aser parnoki maongka aika nguteta liasü, saka parnoki goal ka danga magütsüteti asaya tembang.

Asaya tembangba sülen stands nung mepetmesü adokba ajanga asayamung ayonger CONMEBOL tekolak menüdaktsütsü, kechiyong final nung ano Argentina aser Colombia nung aika arua shilem agütsü imlar.

## Euro 2024: England-i Netherlands koka final tongogo

**Chiteni/July 11, 2024** (Agencies): Bodhbarnü European Championship semifinal asaya tanabuba nung England-i goal 2-1 agi Netherlands koka final tongtetogo.

Mapang apuloktsür asayaba mapang substitute Ollie Watkin-i goal ka idaktsüba ajanga England-i asaya koka liasü.

England pur final nung Deobarnü Berlin nung Spain sen asayatsü. 1966 küm World Cup akokba aser 2020 küm Euro final nung Italy makokba sülen England team tang mezüngbuba bendang lima ka nung final asayatsü lir.

Asayamung anaprongla final ya Wembley nung asaya liasü. Asaya nung mezüngbuba goal Netherlands atema Xavi Simons-i minute tenetbuba nung idakja liasü, ajisüaka minute 18buba nung Harry Kane-i penalty ka idaktsüba sülen goal kasasa aküm.

Asaya nung team anapronglai goal idaktsütsü atema maongka nguteta asaya, ajisüaka goal midaktsüteti asaya arur asaya tanabuba shilem nung mapang apuloktsür asayaba mapang Watkin-i par team atema goal ka idakja parnoki asaya koka liasü.

## India team CT atema Pakistan-i maotsü akok: BCCI sources

**Chiteni/July 11, 2024** (Agencies): 2025 Champions Trophy atema India cricket team Pakistan aotsü mimlar aser Indian cricket board (BCCI)-i International Cricket Council (ICC) dang parnok asaya Dubai mesüra Sri Lanka nung asayatsü atema asüngdangtsü, ta BCCI sources kati Brehostibarnü ANI dang ashi.

India team 2008 küm nungi tang tashi nung Pakistan-i khen danga oa asaya mali aser team ana ya team aika asayaba asayamungtem nung dang

asaya arudar. Pakistan nung taoba küm Asia Cup ayongzüka asayaogo, saka asayamung ayongertemi "hybrid model" ka benoka India team asayatem Sri Lanka nung asaya liasü, koba India-i kokogo.

India team-i ashiba agi, Pakistan nung oa Asia Cup asayatsü atema sorkari parnok nem temelaba magütsü liasü.

Linük ti asayatsü aliba Champions Trophy asayamung ya taruba küm Pakistan nung February aser March ita asayatsü renema lir.

1996 küm India aser Sri Lanka na den longjemer World Cup ayongzüka asayaba sülen Pakistan nung tang mezüngbuba tongtibang asayamung ka ayongzüka asayatsü lir.

Asayamung koba February 19 nungi March 9 tashi asayatsü lir, iba asayamung atema mapalem takaratiba nung sangdongtsü imlar.

Kasa mapang nung India team Sri Lanka den ODI asem aser England den February ita Champions Trophy masaya tsüngda ODI asem asayatsü sentong yanglur lir.

## Mumbai City FC-i Nikolaos Karelis alizükogo



**Chiteni/July 11, 2024** (Agencies): Taruba Indian Super League season metenzük tsüngda Mumbai City FC-i Brehostibarnü sangdong ka ajanga Greek nung striker Nikolaos Karelis alizükba sangdongogo.

Arishi küm 32 tain Karelis tang mezüngbuba India nung asayatsü lir. Pa mezüng Ergotelis nung asaya tenzük aser 2007 küm mezüngbuba senior professional career tenzük liasü. Karelis taoba mapang Russia (Amkar Perm), Belgium (Genk), England (Brentford) aser Netherlands (ADO Den Haag) nung densema club tenet nungi asayaogo. Mumbai City FC ya pa atema club tibuba asütsü.

Karelis-i tang tashi nung professional asaya 361 nung goal 103 idaktsür lir aser iba den assist 29 sütsür lir. Pa Panathinaikos nung asayaba mapang tajungtiba asayar lir, kong pai asaya 114 nung goal 36 idakja liasü.

2014-15 season ya pa atema season ajak rongnung tajungtiba liasü aser pai asaya 50 nung goal 19 idakja liasü.

Panathinaikos nungi asayaba mapang 2013-14 season nung pai Greek Cup akok. Iba sülen pai Greek club PAOK nungi asayaba mapang 2018-19 season nung title ana (Super League Greece aser Greek Cup) bena liasü.

Karelis tatemsa 2022-23 season nung Greek club Panetolikos nungi asayaogo, kong pa nem player of the season naroküm agüja liasü.

"Küm ishika tsüngda team-i takok tajung nguogo aser taruba season team takok asoshi teyari agütsütsü yongya atar," ta Karelis-i ashi.

MCFC head coach Petr Kratky-i ashiba agi, "Nikos ya sempet tajung aketba asayar ka lir, shiba ozü team forward atema kanga tapet asütsü. Pa asayar tejen ka lir aser league balala nung pai pa sempet kanga junga sayaogo."

## Bayern Munich aser Joao Palhinha na tenangzüktepba yangluogo



**Chiteni/July 11, 2024** (Agencies): Küm ka tejakdang Portugal nung midfielder João Palhinha alizüktsü atema merangdangba tamakok anguba sülen Bayern Munich-i pa den Brehostibarnü tenangzüktepba ka yangluogo.

Palhinha ya English Premier League club Fulham nungi Bayern nung euro million 50 shi yong denogo aser pa 2028 küm June ita tashi club nungi

asayatsü, ta Bayern-i sangdong ka ajanga metetdaktsü.

Palhinha shibai European Championship nung Portugal team quarter final tonga asayaba nung teyari tulu agüja liasü pa Bayern puri tawa alizükba asayartem rongnung tesüsabuba kümogo. 2012 küm takok marok ka danga mongutetba sülen Bayern pur tang team yanglushiba mapang ka lir.

"Palhinha ya FC Bayern puri taoba küm alizüktsü merangdangogo. Pa den tesendaktep meraksai ayutsü kanga tongtibang liasü. Joao-i Bayern-i kanga arunüa liasü aser onokia pa amala asaya ka nüngdaka liasü. Pa onok tarutsü atema kanga tongtibang asütsü," ta Bayern board sporting director Max Eberl-i ashi.

Taoba küm Bayern puri pa alizüktsü ta temulung lema liasü aser Palhinha-a medical test atema Munich-i ao. Ajisüaka transfer window matem tsüngda iba tenangzüktepba ya meyangluteti liasü, koba euro million 65 shi liasü.

Iba mapang Bayern coach Thomas Tuchel-i, Palhinha amala defensive-minded midfielder ka alizüktsü liasü. Iba sülen hopta ana lir Palhinha-i Fulham den 2027-28 season tashi tenangzüktepba ka yanglua liasü.

May ita Vincent Kompany Bayern coach akümba sülen club-i Palhinha densema asayar asem alizükogo. Parnoki Stuttgart defender Hiroki Ito aser Crystal Palace forward Michael Olise na alizükker lir.

## BILEMDANGANG

"Tamakok ajak memerangdangba ajanga ataloker."